

**INTERNACIONALNI BURČ UNIVERZITET
INTERNATIONAL BURCH UNIVERSITY**



**PRAVILA STUDIRANJA
ZA TREĆI CIKLUS STUDIJA**

**RULES OF STUDY
FOR THIRD STUDY CYCLE**

Sarajevo, 2017.

Na osnovu člana 119 i člana 48 (stav 4) Zakona o visokom obrazovanju Kantona Sarajevo - prečišćeni tekst („*Službene novine Kantona Sarajevo*“ br. 42/13 i 13/15), a u vezi sa članom 116 Statuta visokoškolske ustanove Internacionalni Burč univerzitet – International Burch University, Senat Internacionalnog Burč univerziteta je na svojoj CXXXVII sjednici, održanoj 29.03.2017. godine usvojio sljedeća

PRAVILA

studiranja za treći ciklus studija na visokoškolskoj ustanovi
Internacionalni Burč univerzitet – International Burch University
(Prečišćeni tekst)

I OPĆE ODREDBE

Član 1.

Pravilima studiranja trećeg ciklusa studija visokoškolske ustanove „Internacionalni Burč univerzitet – International Burch University“ (u daljem tekstu: Pravila) se uređuje organizacija i izvođenje trećeg ciklusa studija, upis na studij trećeg ciklusa, način provođenja ispita i istraživačkog rada, postupak prijave i odbrane doktorske disertacije, postupak promocije doktora nauka, kao i druga pitanja od značaja za realizaciju studija za sticanje naučnog zvanja doktora nauka/umjetnosti na visokoškolskoj ustanovi „Internacionalni Burč univerzitet – International Burch University“ (u daljem tekstu: Univerzitet).

Član 2.

Trećim ciklusom studija smatra se svaki studijski program koji daje pravo na sticanje diploma akademske titule i naučnog zvanja doktora nauka za određenu oblast, u skladu sa Zakonom, ovim pravilima i Pravilnikom o korištenju akademskih titula i sticanju naučnih i stručnih zvanja na visokoškolskim ustanovama u Kantonu Sarajevo.

Član 3.

Nakon završetka trećeg ciklusa studija student:

- a) pokazuje sposobnost samostalnog istraživačkog rada u oblasti studija, te samostalnost primjene vještina i metoda istraživanja u svojoj oblasti;
- b) pokazuje sposobnost sintetiziranja, eksplikacije, oblikovanja, primjenjivanja, dizajniranja, implementacije i prihvatanja procesa zasnovanih na nauci;
- c) originalnim istraživanjem doprinosi proširenju granica znanja naučnim radom, čiji pojedini dijelovi zaslužuju objavu u domaćim i međunarodno referentnim publikacijama;
- d) sposoban je za kritičku analizu, evaluaciju i sintezu novih i kompleksnih ideja;
- e) promovira, u akademskom i profesionalnom kontekstu, tehnološki, društveni ili kulturni napredak u društvu zasnovanom na znanju.

II UPIS NA TREĆI CIKLUS STUDIJA

Član 4.

- (1) Upis na treći ciklus studija vrši se na osnovu javnog konkursa koji objavljuje Univerzitet, o čemu odluku donosi Senat Univerziteta.
- (2) Broj studenata za upis na treći ciklus studija utvrđuje Senat Univerziteta, uz saglasnost osnivača Univerziteta.

Član 5.

- (1) Pravo upisa na treći ciklus studija imaju kandidati sa završenim drugim ciklusom studija.
- (2) Kandidati koji su okončali studij medicinske grupe nauka u trajanju od 6 godina po predbolonjskom sistemu, mogu biti upisani na prvu godinu doktorskog studija uz odobrenje vijeća organizacione jedinice, te ispunjavanjem drugih uslova propisanih konkursom za upis studenata.
- (3) Kandidat koji je ispunio uslov iz stava 1 ovog člana ima pravo upisa i na programe iz drugih oblasti koje se razlikuju od oblasti studijskog programa prvog i drugog ciklusa studija koji je završio, pod uslovima koje utvrdi vijeće organizacione jedinice.
- (4) Rangiranje kandidata vrši se na osnovu Odluke o kriterijima i mjerilima za utvrđivanje redoslijeda prijema kandidata za upis u prvu godinu trećeg ciklusa studija na visokoškolskoj ustanovi Internacionalni Burč univerzitet - International Burch University.

Član 6.

Bliže uslove za upis kandidata iz prethodnog stava utvrđuje Senat Univerziteta.

Član 7.

- (1) Nastava na trećem ciklusu studija se izvodi na engleskom jeziku izuzev Odsjeka za orijentalnu filologiju na kojem se nastava izvodi na turskom jeziku.
- (2) Da bi student mogao pohađati nastavu, mora imati određeni nivo znanja iz engleskog jezika, odnosno turskog jezika na Odsjeku za orijentalnu filologiju.
- (3) Nivo znanja engleskog odnosno turskog jezika kandidata ocjenjuje se prema rezultatu ispita iz poznavanja predmetnog jezika ili ekvivalentnim rezultatima postignutim na drugim ispitima iz poznavanja predmetnog jezika koje odredi Senat Univerziteta.
- (4) Za upis na naučni stepen doktora, Senat Univerziteta utvrđuje prihvatljiv rezultat postignut na ovim ispitima.

Član 8.

Za provođenje postupka rangiranja Senat Univerziteta može imenovati posebnu Komisiju.

Član 9.

- (1) Komisija iz prethodnog člana konačni izvještaj o rezultatima upisa studenata dostavlja vijeću organizacione jedinice.
- (2) Konačnu listu usvaja Senat Univerziteta.

Član 10.

- (1) Kandidati sa istim brojem bodova imaju jednako pravo upisa.
- (2) Rezultati konkursa objavljuju se na oglasnoj ploči Univerziteta, odnosno fakulteta.
- (3) Kandidat koji smatra da postupak rangiranja nije pravilno proveden, ima pravo prigovora u skladu sa zakonskom procedurom.
- (4) Odluka se saopštava podnosiocu prigovora i objavljuje na oglasnoj ploči Univerziteta i fakulteta.

Član 11.

- (1) Kandidat koji je ostvario pravo na upis, a u predviđenom roku nije izvršio upis, gubi pravo upisa, a umjesto njega pravo na upis stiže sljedeći kvalifikovani kandidat na rang listi.
- (2) Student sa Univerzitetom zaključuje ugovor o studiranju, kojim se bliže utvrđuju njihova međusobna prava i obaveze.

Član 12.

Strani državljani imaju pravo upisa na studij trećeg ciklusa pod jednakim uslovima kao i državljani Bosne i Hercegovine u skladu sa Zakonom.

III UPIS PUTEM PRELAZA

Član 13.

- (1) Studentu koji je trenutno upisan na naučni stepen doktora na nekoj drugoj visokoškolskoj ustanovi u Bosni i Hercegovini ili inostranstvu, po dostavljanju svih potrebnih dokumenata, može se odobriti prijelaz samo na isti ili srodan studijski program.
- (2) Studentu koji prelazi na IBU sa drugog univerziteta može se organizovati ispit iz znanja engleskog jezika, odnosno turskog ukoliko se upisuje na Odsjek za orijentalnu filologiju.
- (3) Kreditni ekvivalent za studente koji prelaze sa univerziteta gdje je dužina semestra drugačija od IBU, utvrđuje vijeće organizacione jedinice.
- (4) Prijelaz odobrava dekan organizacione jedinice, a na osnovu odluke vijeća organizacione jedinice na način utvrđen ovim pravilima, Statutom i drugim općim aktima IBU.
- (5) Studenti koji su trenutno upisani na naučni stepen doktora na jednom od studijskih programa IBU imaju mogućnost da slobodno izaberu neki drugi studijski program koji vodi do naučnog stepena doktora, a koji je pokrenut u okviru organizacionih jedinica IBU.
- (6) Studenti koji su upisani na redovan studij u okviru trećeg ciklusa na IBU, imaju mogućnost prijelaza na studij na daljinu u okviru istog studijskog programa (i obratno), uz ispunjavanje proceduralnih i finansijskih uslova za prijelaz.
- (7) Prijelaz iz stava 6 ovog člana odobrava dekan organizacione jedinice na zahtjev studenta.

Član 14.

- (1) Studentu koji je položio ispit na drugom studijskom programu priznaje se položen ispit, ako predmet iz kojeg je ispit položen, po svojoj sadržini i obimu odgovara predmetu koji je student upisao, što se dokazuje dokumentima predviđenim ECTS pravilima.
- (2) Ako predmet iz kojeg je ispit položen po svojoj sadržini i obimu približno odgovara predmetu

koji je student upisao, nastavnik može priznati ispit u cjelini ako je ocijenio da je student kroz obrađeni i položeni program stekao znanje i vještine u mjeri dovoljnoj za priznavanje ispita.

- (3) Priznavanjem ispita priznaje se i ocjena kojom je student ocijenjen na ispitu.
- (4) Broj bodova priznatog ispita utvrđuje se u skladu sa pravilima ECTS.
- (5) Ako postoji razlika u nastavnim programima položenih predmeta, utvrđuje se odgovarajuća razlika predmeta ili dijela predmeta koje je student dužan položiti.
- (6) Student je dužan da u daljem školovanju na Univerzitetu položi utvrđenu razliku ispita i da stekne broj kredit-bodova predviđenih za upis u naredne godine studija u skladu sa odredbama ovih Pravila.

IV UPIS NA PRIPREMNI PROGRAM IZ ENGLESKOG JEZIKA

Član 15.

- (1) Kandidati za koje se utvrdi da ispunjavaju uslove za upis na treći ciklus studija, ali nisu uspjeli položiti ispit iz poznavanja engleskog jezika ili nisu polagali ispit iz znanja engleskog jezika, upućuju se na usavršavanje koje organizuje Pripremna škola engleskog jezika.
- (2) Po završetku usavršavanja, kandidati su obavezni položiti ispit iz poznavanja engleskog jezika u okviru Pripremne škole ili ekvivalentni ispit u drugoj instituciji koja organizira takve vidove usavršavanja, a o čijoj prihvatljivosti odlučuje vijeće organizacione jedinice.

V ORGANIZACIJA TREĆEG CIKLUSA STUDIJA

Član 16.

- (1) Univerzitet, odnosno fakulteti Univerziteta organizuju i realizuju treći ciklus studija iz oblasti za koje su matični.
- (2) Studij trećeg ciklusa se organizuje u punom fondu sati predviđenim nastavnim planom i programom kao redovni studij i kao studij na daljinu.

VI STUDIJ NA DALJINU – DL STUDIJ

Član 17.

- (1) Studij na daljinu je formaliziran sistem edukacije samofinansirajućih studenata kojim se korištenjem računalnih tehnologija i interaktivnih nastavnih materijala osigurava pristup nastavnim procesima.
- (2) Studij trećeg ciklusa studija na Internacionalnom Burč univerzitetu – International Burch University može se organizirati u fondu sati prilagođenom studentima koji nisu u mogućnosti pohađati redovni studij kao studij na daljinu.

Član 18.

- (1) Kada se nastava odnosno pojedini oblici nastave organiziraju u formi “učenja na daljinu” ispiti se obavezno održavaju u sjedištu organizacione jedinice.
- (2) Praktični rad i stručna praksa mogu se organizirati i realizirati kao sastavni dio nastave u sjedištu Univerziteta ili na mjestu njihove realizacije.

- (3) Doktorska disertacija u okviru studija na daljinu se brani u sjedištu organizacione jedinice. Izuzetno, vijeće organizacione jedinice može odobriti odbranu doktorske disertacije putem video/internet veze.
- (4) Da bi vijeće organizacione jedinice odobrilo organiziranje odbrane doktorske disertacije putem video/internet veze, potrebno je da student priloži zahtjev, pismeno odobrenje mentora, te dokaze koji opravdavaju takav način odbrane.
- (5) U svakom slučaju, student prethodno mora ispuniti sve proceduralne i finansijske obaveze prema Univerzitetu.

VII VIJEĆE DOKTORSKOG STUDIJA

Član 19.

- (1) Vijeće doktorskog studija prije početka studijske godine predlaže vijeću organizacione jedinice predmetne nastavnike koji će izvoditi studij na trećem ciklusu.
- (2) Vijeće doktorskog studija Univerziteta sačinjavaju svi rukovodioci odsjeka na kojima se izvodi nastava na trećem ciklusu studija.
- (3) Vijećem doktorskog studija rukovodi predsjednik.
- (4) Predsjednika Vijeća doktorskog studija Univerziteta imenuje Senat iz reda nastavnika u radnom odnosu na Univerzitetu u zvanju docenta, vanrednog i redovnog profesora.
- (5) U odsustvu predsjednika, Vijećem doktorskog studija predsjedava član kojeg predsjednik Vijeća ovlasti.
- (6) Mandat predsjednika Vijeća doktorskog studija traje 3 godine uz mogućnost ponovnog izbora.

Član 20.

- (1) Vijeće doktorskog studija rješava pitanja koja se odnose na organizaciju i tok studiranja, i to naročito:
 - a) poslove koji su Zakonom izričito određeni kao poslovi Vijeća studija;
 - b) ostale poslove koji nisu u izričitoj nadležnosti Senata i vijeća organizacione jedinice.
- (2) Za svoj rad Vijeće odgovara Senatu Univerziteta.

VIII ZAJEDNIČKI/MULTIDISCIPLINARNI STUDIJSKI PROGRAM

Član 21.

- (1) Univerzitet može organizovati i izvoditi studij trećeg ciklusa iz jedne ili više naučnih oblasti, na dva ili više fakulteta Univerziteta ili zajedno sa drugom visokoškolskom ustanovom iz zemlje ili inostranstva, uz saglasnost matičnog fakulteta (u daljem tekstu: zajednički studijski program) i u skladu sa Zakonom.
- (2) Zajednički studijski program mogu organizovati fakulteti iz naučnih oblasti za koje su matični.
- (3) Odluku o organizovanju zajedničkog studijskog programa donosi Senat Univerziteta.
- (4) Odlukom o organizovanju zajedničkog studijskog programa utvrđuju se sva pitanja za ovaj studij, a posebno program studija, način organizacije studija, te akademska titula i naučno zvanje koje se stiče završetkom studija.
- (5) Predlagači zajedničkog studija utvrđuju program, koji je usvojen od strane nadležnih tijela

svih učesnika u programu.

Član 22.

Organizatori zajedničkog studijskog programa zaključuju ugovor kojim se regulišu: uslovi i načini realizacije nastave, procedure odobravanja i odbrane doktorske disertacije, korištenje prostora i opreme, uslovi stjecanja i raspoređivanja sredstava, rukovođenje studijem, kod koga će se voditi evidencija o studentu (upis, izdavanje uvjerenja, diploma i sl.), i druga prava i obaveze organizatora zajedničkog studijskog programa.

IX VREDNOVANJE RADA STUDENATA

Član 23.

- (1) Studenti moraju sredinom semestra polagati ispit i/ili završiti druge zadane projekte/domaće zadatke tokom semestra, a pored toga moraju polagati i završni ispit i/ili kompletirati završni projekt radi ocjene iz određenog predmeta.
- (2) Univerzitet će odrediti i najaviti vrijeme i mjesto završnih ispita.
- (3) Završnu ocjenu studentima daje predmetni nastavnik.
- (4) Završna ocjena se bazira na ocjeni iz parcijalnog ispita, ocjeni završnog ispita i/ili ocjeni završnog projekta i evidenciji pohađanja.
- (5) Studentima koji su propustili bilo koji ispit može se odobriti popravni ispit, pod uslovom da nadležni odsjek utvrdi da je postojao valjan razlog za neprisustvovanje ispitu.

X OCJENJIVANJE

Član 24.

Za svaki ispit koji studenti polažu predmetni nastavnici dodjeljuju jednu od niže navedenih slovnih ili brojevanih ocjena kao ocjenu na kraju semestra. Sistem ocjenjivanja na IBU je sljedeći:

<i>Procenat/Broj bodova</i>	<i>Slovna ocjena iz predmeta</i>	<i>Brojčana ocjena iz predmeta</i>
<i>95-100</i>	<i>A</i>	<i>10</i>
<i>85-94</i>	<i>B</i>	<i>9</i>
<i>75-84</i>	<i>C</i>	<i>8</i>
<i>65-74</i>	<i>D</i>	<i>7</i>
<i>55-64</i>	<i>E</i>	<i>6</i>
<i>54 i niže</i>	<i>F</i>	<i>5</i>

XI PROSJEK OCJENA

Član 25.

- (1) Prosjek ocjena studenta dobija se izračunavanjem aritmetičke sredine.
- (2) Sve ocjene se prikazuju na transkriptu/uvjerenju o položenim ispitima studenta.

XII GUBITAK STATUSA STUDENTA

Član 26.

Student gubi status studenta iz sljedećih razloga:

- a) okončanjem ciklusa studija,
- b) ispisom sa visokoškolske ustanove,
- c) isključenjem po postupku i uz uslove utvrđene zakonom, statutom ili drugim odgovarajućim aktom Univerziteta,
- d) ukoliko ne izvrši upis i ovjeru semestra dva puta (2x) zaredom,
- e) ako prijedlog teze bude odbačen od strane nadležne komisije dva puta,
- f) ako studenti ne završe studijski program u predviđenom roku,
- g) kao i zbog drugih razloga predviđenih drugim propisima Univerziteta.

XIII DOKTORSKI PROGRAM - CILJEVI

Član 27.

- (1) Predmet i cilj doktorskog programa je da studenti provedu samostalno istraživanja, izražavajući svoje mišljenje u pogledu naučnih dostignuća, te poduzmu potrebne korake u cilju dosezanja novih naučnih sinteza.
- (2) Doktorska disertacija mora ispuniti jedan od sljedećih uslova:
 - a) pokazati novi pristup polju istraživanja,
 - b) koristiti novi naučni metod/pristup ili
 - c) primjeniti postojeći metod na novo polje istraživanja.

XIV TRAJANJE TREĆEG CIKLUSA STUDIJA

Član 28.

- (1) Treći ciklus studija traje tri studijske godine (šest semestara), odnosno obim studijskog programa ovih studija vrednuje se sa 180 (E)CTS studijskih bodova.
- (2) Doktorski studij se sastoji od najmanje 8 predmeta, ukupne minimalne vrijednosti 60 ECTS, prijedloga doktorske disertacije, najmanje dva kontrolna ispitivanja disertacije i disertacija.
- (3) Kandidatu se rokovi utvrđeni ovim članom mogu produžiti ako postoje opravdani razlozi za produženje, o čemu odluku donosi vijeće organizacione jedinice.

Član 29.

- (1) Studijski programi trećeg ciklusa studija podijeljeni su na studijske godine i semestre.
- (2) U skladu sa evropskim sistemom prenosa bodova (E)CTS obim studijskog programa iznosi

30 (E)CTS bodova u jednom semestru.

- (3) Broj studijskih bodova za pojedini predmet određuje se prema ukupnom opterećenju studenta (teorijska i/ili praktična nastava, vježbe, seminari i sl.), vremenu rada studenta na samostalnim zadacima (domaći zadaci, projekti, seminarski radovi i sl.) i vremenu za učenje kod pripreme za provjeru znanja i ocjenjivanja (testovi, završni ispit i sl.).

Član 30.

- (1) Student ima pravo da u toku studija provede određeno vrijeme (semestar ili studijsku godinu) na srodnoj ustanovi visokog obrazovanja u zemlji ili inostranstvu, posredstvom međunarodnih programa za razmjenu studenata, na osnovu bilateralnih ugovora koje zaključuje Univerzitet ili na prijedlog studenta po prethodno pribavljenoj saglasnosti Univerziteta.
- (2) Načini provođenja mobilnosti studenata utvrđeni su Statutom Univerziteta.

XV USLOVI ZA PREDMETNOG NASTAVNIKA NA DOKTORSKOM STUDIJU

Član 31.

- (1) Predmetni nastavnik na doktorskom studiju može biti nastavnik u svim zvanjima (docent, vanredni profesor i redovni profesor).
- (2) Kao predmetni nastavnik može biti angažovan i stručnjak iz prakse i gostujući profesor.
- (3) Mentor na doktorskom studiju može biti nastavnik u svim zvanjima (docent, vanredni profesor i redovni profesor).

XVI IMENOVANJE MENTORA I KOMISIJE ZA ODBRANU PRIJEDLOGA TEME I NADZOR IZRADE DOKTORSKE DISERTACIJE

Član 32.

- (1) U toku trećeg semestra studija student prijavljuje vijeću organizacione jedinice prijedlog teme doktorske disertacije i mentora, uz uslov da je položio sve ispite predviđene nastavnim planom i programom.
- (2) Prijedlog teme doktorske disertacije potpisuju student i mentor kojeg student predlaže. Vijeće organizacione jedinice odlučuje o imenovanju mentora, te podnosi Senatu Univerziteta prijedlog odluke o imenovanju komisije za odbranu prijedloga teme i nadzor izrade doktorske disertacije koja se sastoji od 3 člana.
- (3) O sastavu komisije iz stava (2) ovog člana konačno odlučuje Senat Univerziteta.
- (4) O izmjenama sastava komisije odlučuje Senat na prijedlog vijeća organizacione jedinice.

XVII MENTOR

Član 33.

- (1) Mentor se imenuje iz reda akademskog osoblja Univerziteta ili druge visokoškolske ustanove u zvanjima docent, vanredni profesor i redovni profesor iz naučne oblasti iz koje se radi doktorska disertacija.
- (2) Mentor za izradu doktorske disertacije dužan je da pomaže studentu pri izboru metoda

naučnoistraživačkog rada, literature, pripremi strukture rada, kao i da mu pruža stručnu pomoć.

- (3) Ako predmet teme doktorske disertacije zahtijeva više od jednog mentora, može se imenovati i komentor.
- (4) U slučaju ukazane potrebe vijeće organizacione jedinice može donijeti odluku o zamjeni mentora/komentora, ali uz postojanje opravdanih razloga za zamjenu.

XVIII ODBRANA PRIJEDLOGA TEZE

Član 34.

- (1) Odmah po imenovanju komisije za odbranu prijedloga teme i nadzor izrade doktorske disertacije, studentu se daje rok od najduže tri mjeseca za odbranu prijedloga teme disertacije pred komisijom.
- (2) Komisija za odbranu prijedloga teme i nadzor izrade doktorske disertacije podnosi izvještaj o odbrani prijedloga teme vijeću organizacione jedinice koje donosi konačnu odluku o odobravanju teme doktorske disertacije.
- (3) Student čiji je prijedlog odbijen ima pravo zahtijevati novog mentora, te novu temu doktorske disertacije. U tom slučaju može se imenovati nova komisija. Student koji želi nastaviti saradnju sa istim mentorom dužan je odbraniti svoj prijedlog doktorske disertacije u roku od mjesec dana nakon ponovnog prijedloga, dok student koji je promijenio mentora ima rok od 3 mjeseca za ponovnu odbranu prijedloga.

XIX OCJENA NAPRETKA IZRADE DOKTORSKE DISERTACIJE

Član 35.

- (1) Nakon što je kandidatu od strane vijeća organizacione jedinice odobrena tema doktorske disertacije, komisija za odbranu prijedloga teme i nadzor izrade doktorske disertacije će se sastati najmanje dva puta prije odbrane (u pravilu, jednom po semestru), a sve u cilju ispitivanja napretka izrade disertacije.
- (2) Student je dužan mentoru predati pisani izvještaj o napretku izrade doktorske disertacije, a radi utvrđivanja spremnosti studenta da brani navedeni izvještaj pred komisijom za nadzor izrade doktorske disertacije. Ukoliko komisija ocijeni izvještaj pozitivnim, mentor će dostaviti navedeni izvještaj sekretaru organizacione jedinice u cilju zakazivanja datuma odbrane napretka izrade disertacije. Izvještaj se brani pred komisijom nakon proteka najmanje sedam dana od dana dostavljanja istog sekretaru organizacione jedinice.
- (3) Izvještaj o napretku izrade doktorske disertacije sadrži sažetak do tada napisanog dijela disertacije, te plan rada za naredni semestar. Komisija za nadzor daje ocjenu U (uspješan) ili N (neuspješan).
- (4) Student mora pristupiti najmanje dva puta ispitivanju disertacije, te dobiti ocjene U – uspješan. Ukoliko student dva puta uzastopno bude ocjenjen kao neuspješan, isti će biti isključen sa doktorskog programa.
- (5) Ukoliko je student podnio zahtjev za promjenu teme doktorske disertacije, a prije podnošenja zahtjeva je uspješno odbranio dva izvještaja o napretku izrade disertacije, komisija za odbranu prijedloga teme i nadzor izrade doktorske disertacije se mora sastati još najmanje jednom u cilju ispitivanja napretka disertacije. Izuzetno, ukoliko se radi o promjeni naslova teme koja ne utiče na sadržaj niti suštinu doktorske disertacije, komisija može odlučiti da

ispitivanje doktorske disertacije nije neophodno.

- (6) Ako je po zahtjevu studenta tema doktorske disertacije u potpunosti ili najvećem dijelu promijenjena, vijeće organizacione jedinice može predložiti Senatu Univerziteta imenovanje nove komisije za odbranu prijedloga teme i nadzor izrade doktorske disertacije. Imenovanje nove komisije nije neophodno ukoliko je većina članova prethodno imenovane komisije iz naučne oblasti nove teme doktorske disertacije.
- (7) Prilikom posljednjeg ispitivanja disertacije, članovi komisije u saradnji sa Uredom za publikacije utvrđuju da je disertacija spremna za odbranu, da nije plagijat, da je metodološki ispravno koncipirana, te da ne postoji potreba za izmjenama ili korekcijama u radu.
- (8) Odbrana prijedloga teze, te odbrana izvještaja o napretku doktorske disertacije organiziraju se u sjedištu organizacione jedinice. Izuzetno, vijeće organizacione jedinice može, a na obrazložen zahtjev studenta i pismeno odobrenje mentora, odobriti organiziranje odbrane prijedloga teze i odbrane izvještaja o napretku izrade disertacije putem video/internet veze.

XX ODBRANA DOKTORSKE DISERTACIJE

Član 36.

- (1) Studenti koji uspješno polože predmete predviđene planom i programom moraju napisati doktorsku disertaciju na engleskom jeziku (uz izuzetak Odsjeka za orijentalnu filologiju - turski jezik i književnost, gdje se rad piše na turskom jeziku), koristeći podatke iz svog istraživanja, te slijedeći pravila navedena u Pravilniku za izradu završnog rada/disertacije.
- (2) Student dokorskog studija je obavezan objaviti članke u naučnim indeksiranim časopisima samostalno ili u saradnji (ko-autorstvu) sa svojim mentorom, a koji su u vezi sa doktorskom disertacijom, i nakon toga odbraniti tezu na engleskom jeziku (na Odsjeku za orijentalnu filologiju na turskom jeziku) pred Komisijom za ocjenu i odbranu doktorske disertacije.
- (3) Minimum objavljenih članaka u međunarodnim indeksiranim časopisima je sljedeći:
 - a) Na Fakultetu za inženjering i prirodne nauke visokoškolske ustanove Internacionalni Burč univerzitet – International Burch University: dva članka u koautorstvu s mentorom od kojih najmanje jedan treba biti objavljen u međunarodnim indeksiranim časopisima SSCI ili SCI/SCI-prošireni indeks, sa izuzetkom Odsjeka za arhitekturu gdje je neophodno da najmanje jedan članak bude objavljen u indeksiranom časopisu AHCI, Avery Index ili DAAI (također u koautorstvu s mentorom),
 - b) Na Fakultetu za edukaciju i humanističke nauke visokoškolske ustanove Internacionalni Burč univerzitet – International Burch University:
 - dva članka u koautorstvu s mentorom od kojih najmanje jedan treba biti objavljen u međunarodnim indeksiranim časopisima AHCI, SSCI ili SCI/SCI-prošireni indeks za Odsjek za engleski jezik i književnost
 - dva članka u koautorstvu s mentorom moraju biti objavljena u međunarodnim indeksiranim časopisima/zbornicima za Odsjek za orijentalnu filologiju
 - c) Na Fakultetu za ekonomiju i društvene nauke visokoškolske ustanove Internacionalni Burč univerzitet – International Burch University: dva članka u koautorstvu s mentorom od kojih najmanje jedan treba biti objavljen u međunarodnim indeksiranim časopisima SSCI ili SCI/SCI-prošireni indeks.

XXI IMENOVANJE KOMISIJE ZA OCJENU I ODBRANU DOKTORSKE DISERTACIJE

Član 37.

- (1) Po završetku doktorske disertacije, student podnosi pismeni zahtjev za zakazivanje ocjene i odbrane doktorske disertacije sekretaru organizacione jedinice. Uz zahtjev, dostavljaju se i dokazi o objavljenim radovima, izvještaj iz službene evidencije o položenim ispitima i ECTS bodovima, te dovoljan broj primjeraka disertacije (nekoričenih).
- (2) Student dostavlja jedan primjerak doktorske disertacije u elektronskoj formi Uredu za publikacije sa ciljem utvrđivanja da se ne radi o plagijatu. Detaljnija procedura vezana za plagijat se uređuje internim aktom Ureda za publikacije.
- (3) Dokumentacija iz stava (1) ovog člana se dostavlja komisiji za ocjenu i odbranu doktorske disertacije, zajedno sa odlukom o imenovanju ove komisije.
- (4) Komisiju za ocjenu i odbranu doktorske disertacije imenuje Senat na prijedlog vijeća organizacione jedinice najkasnije 30 dana od dana podnošenja urednog zahtjeva sekretaru organizacione jedinice. Komisija se sastoji od 3 do 5 članova, od kojih najmanje jedan član može biti imenovan sa drugog univerziteta. Mentor je član komisije po položaju. Izuzetno, ako član komisije sa drugog univerziteta ili neki drugi član budu spriječeni da prisutvuju odbrani disertacije, izuzev mentora čije prisustvo je obavezno, kao član komisije može se pojaviti zamjenski član koji je imenovan u odluci Senata.
- (5) Sekretar organizacione jedinice je po položaju član komisije bez prava glasa, sa zadatkom za obavljanje administrativno-tehničkih aspekata odbrane doktorske disertacije.
- (6) Komisija je dužna da sačini i dostavi izvještaj o doktorskoj disertaciji (kratki prikaz disertacije: postavljeni ciljevi, primijenjene metode, dobiveni rezultati i zaključci o realizovanim istraživanjima) vijeću organizacione jedinice u roku od 30 dana od dana prijema disertacije. Prilikom pregleda disertacije, komisija može istu vratiti studentu na doradu i dopunu, te odrediti rok (koji ne može biti kraći od 20 dana niti duži od 2 mjeseca) u kojem tu obavezu treba izvršiti. Ukoliko komisija ocijeni da doktorska disertacija ni nakon dorade i dopune ne ispunjava kriterije potrebne za odbranu iste, predložit će vijeću organizacione jedinice da odbije doktorsku disertaciju. U tom slučaju, student može podnijeti prijedlog nove teme doktorske disertacije u roku od 30 dana od dana prijema odluke o odbijanju.
- (7) Nakon prijema izvještaja komisije, vijeće organizacione jedinice predlaže Senatu Univerziteta donošenje odluke o izvještaju komisije i prihvatanju ili neprihvatanju doktorske disertacije.
- (8) Konačnu odluku o izvještaju komisije za ocjenu i odbranu doktorske disertacije donosi Senat Univerziteta u roku od 30 dana od dana prijema izvještaja komisije. Ako Senat Univerziteta ne prihvati izvještaj komisije, student može izvršiti ispravke disertacije u skladu sa primjedbama u roku ne dužem od 30 dana. Ukoliko Senat ocijeni da doktorska disertacija ni nakon dorade i dopune ne ispunjava kriterije potrebne za odbranu iste, donijet će odluku o odbijanju doktorske disertacije. U tom slučaju, student može podnijeti prijedlog nove teme doktorske disertacije u roku od 30 dana od dana prijema odluke o odbijanju.
- (9) Ukoliko Senat prihvati izvještaj komisije, student može pristupiti odbrani doktorske disertacije po isteku najmanje 15 dana od dana donošenja odluke o usvajanju izvještaja komisije da je student uspješno izradio doktorsku disertaciju. Odluka o usvajanju izvještaja i datumu odbrane doktorske disertacije dostavlja se studentu i objavljuje na oglasnoj tabli organizacione jedinice. Datum odbrane se također objavljuje na službenoj internet stranici organizacione jedinice.
- (10) Ako student ne zadovolji na odbrani doktorske disertacije, još jednom ima pravo na odbranu iste doktorske disertacije ili da zatraži da mu se odobri izbor nove teme. Odluku o zahtjevu kandidata za promjenu mentora odnosno teme doktorske disertacije donosi Senat Univerziteta na prijedlog vijeća organizacione jedinice.

- (11) Formu odbrane doktorske disertacije utvrđuje Senat. Odbrana doktorske disertacije, koja se sastoji od praktičnog i usmenog ispita može biti realizirana u dva dijela u periodu ne dužem od sedam dana nakon obavljanja praktičnog dijela ispita. Ukoliko se doktorska teza sastoji iz dva dijela (praktične demonstracije i usmenog ispita) student će prvo obaviti praktični dio a zatim započeti usmenu odbranu pismenog dijela disertacije.
- (12) Na kraju ispita, komisija će bez prisustva javnosti donijeti odluku: “odobreno”, “odbijeno” ili “ponavljanje odbrane”. Kandidat čija disertacija je ocijenjena “odbijeno” može ponovno aplicirati sa novom disertacijom u roku od 1 godine nakon odbijanja disertacije, dok kandidat čija disertacija je ocijenjena kao “ponavljanje odbrane” može ponovno aplicirati za odbranu iste u periodu od 3 mjeseca po donošenju odluke komisije. U tim slučajevima Senat će na prijedlog vijeća organizacione jedinice, a nakon zahtjeva studenta, imenovati novu komisiju za ocjenu i odbranu doktorske disertacije. Od studenata se zahtjeva registracija svakog semestra. Student čija odbrana doktorske disertacije dva puta bude ocijenjena kao “odbijeno” gubi status studenta.

XXII ISPRAVE I EVIDENCIJE O STUDIJU

Član 38.

- (1) Student koji je položio sve ispite predviđene studijskim programom trećeg ciklusa studija, odbranio doktorsku disertaciju i ispunio sve ostale obaveze propisane Statutom Univerziteta i ovim Pravilima, stiče akademsku titulu i naučno zvanje, odnosno diplomu završenog trećeg ciklusa studijskog programa.
- (2) Uz diplomu se obavezno izdaje i dodatak diplomi radi detaljnog uvida u nivo, prirodu, sadržaj, sistem i pravila studiranja i postignute rezultate tokom studija.

Član 39.

- (1) Do dodjeljivanja diplome, izdaje se uvjerenje o završenom trećem ciklusu studija u kojem se navodi da je privremenog karaktera.
- (2) Senat Univerziteta utvrđuje datum svečane promocije dodjele diploma o završenom trećem ciklusu studija.

XXIII PRELAZNE I ZAVRŠNE ODREDBE

Član 40.

Na druga pitanja vezana za organizaciju nastave i način nastavnog rada, te za prava i obaveze studenta tokom studija, a koja nisu regulisana ovim Pravilima, primjenjivat će se Statut Univerziteta i Pravila studiranja za prvi i drugi ciklus studija na Univerziteta.

Član 41.

Pravila stupaju na snagu danom donošenja, a primjenjivat će se počev od studijske 2017/2018. akademske godine.

Sarajevo, 29.03.2017.

Broj: 01-88/17

Predsjedavajući Senata
Prof. dr. Damir Marjanović

Dostavljeno:
3x organizacione jedinice
1x a/a